

## Guijtz Ganid Ni Bacuaa Juan

### *Xtidx Dios ni runiidx yäl nabajñ par tejpas loonu*

<sup>1</sup> Galooli che gajd Dios gun guedxliuj, agac nabajñ Jesucrist. Niluxh narä bahuiä loj Jesucrist, biejn diagä rediidx ni guniini loä, gunazä ñaani. Laani najc Diidx ni runiidx yäl nabajñ par tejpas loonu. <sup>2</sup> Baluilojni loonu; reapost bahuiinu lojni. Ni'cni rniä lojtu, nabajñ Jesucrist par tejpas. Rniliäpac nabannäj Jesucrist Dios. Baluii Dios Jesucrist loonu. <sup>3</sup> Caniä stehuält lojtu, bahuiinu lojni. Biejn diajgnu rediidx ni guniini loonu. Xhigab xtenu najc tejtis con Dios, najza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennänu resa'nu. <sup>4</sup> Cagucuaä rediidxre lojtu te guibalazduxhtu.

### *Dios najc Bajl*

<sup>5</sup> Naj cagusule'ä rediidx nani baluii Jesucrist loonu. Dios najc bajl. Guiraa redzuun ni rujñni, ganax dzunsa'cni. Xhet yäl nacäydi yu' lo Dios. <sup>6</sup> Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runijtnu dinu chasanäj xtidx Dios. <sup>7</sup> Palga nabajñnu lo bianij si'cni nabajñ Dios lo bianij, tejtis xhigab riennu con resa'nu. Dxejc rusiaza xtiejn Jesucrist Xi'n Dios lastoonu che riennu dojl. <sup>8</sup> Palga naanu xheti xtojñnu, rusgueenu lagajc nuunu, luxh dinu ga'p xtidx Dios neñ lastoonu. <sup>9</sup> Palga guicäjpnü lo Dios guiraa redojl ni cayennu, siäl lajñni xtojñnu, sudzucajni rextojñnu, sa'csi laaca

rujn̄ni luxh gulii najc rextiidxni. <sup>10</sup> Palga guinu-unu dinu niujn dojl̄, rniinu najc Dios si'c te bejn̄ ni rnii didx-xhii sa'csi anaj Dios yu' xtojln̄u, luxh dizanu ga'p xtidx Dios neñ lastoonu.

## 2

### *Racnäj Jesucrist nuunu nez loj Dios*

<sup>1</sup> Guejbtu, resa'ä nani huililajz xtidx Dios, cagucuaä rediidxre lojtu lo guijtz te na'c guntu dojl̄. Niluxh palga jiennu dojl̄, racnäj Jesucrist nuunu, rniini xcuentnu lo Dios, sa'csi xheti xtojln̄i. <sup>2</sup> Gujt Jesucrist xcuentnu lo crujz. Gudijxni rextojln̄u lo crujz. Luxh et rextojltisnu gudijxni. Gudijxni rextojl̄ guiraa rebejn̄ ni re' lo guideb guedxliuj.

<sup>3</sup> Palga rusoobnu rextidx Dios, huenliisi rluii riembeenu Dios. <sup>4</sup> Cheni rnii te bejn̄, “narä rum-beäni”, niluxh dini gusoob rextiidxni, rusgueeni resabejn̄ni. Di lajzni nilii xtidx Dios. <sup>5</sup> Palga rusoobnu xtidx Dios, guliipac rinälaaznu Dios, ni'c najnnu nabaññäjnuni. <sup>6</sup> Cheni rniinu nabaññäjnu Jesucrist, nanabpac guibañsa'cnu si'c gubajn̄ Jesucrist lo guedxliuj.

### *Redidxcoob*

<sup>7</sup> Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejn̄ diajgtu galooli. <sup>8</sup> Niluxh najcza rediidxre didxcoob loonu, sa'csi che huililajznu rextiidxni gusloj dirunu guibajn̄ lo yäl̄nacäjy. Baluii Jesucrist redidxcoobga loonu. Guliipac najc Dios si'c bajl̄. Dini guibajn̄ lo nacäjy.

<sup>9</sup> Palga chutis tejnu rnii, “nabaṅä lo nianij xten Dios”, niluxh rdxe'chni lo resa'ni, lo yälṅacäy yu'ni. <sup>10</sup> Chutis tejnu ni rinälajz sa'ni, nabajṅni lo bianij xten Dios, rujni dzunsa'c, dizani guichagljaz gunni dojl. <sup>11</sup> Niluxh palga rdxe'chnu lo resa'nu, nabajṅnu lo yälṅacäy sa'csi riennu dojl, sasaanu lo yälṅacäy. Nicla gacbeenu canejz chonnu, sa'csi ruscäy beṅdxab balojnu.

<sup>12</sup> Cagucuaä rediidxre lo guejbtu, resa'ä ni rililajz, sa'csi abadzucaj Dios rextojṅnu, sa'csi lo cruzj gudijz Jesucrist rextojṅnu. <sup>13</sup> Cagucuaä rediidxre lo guejbtu, redad beṅgool, sa'csi huililajztu rextidz Jesucrist, najntu laani nabajṅni galooli näjza par tejpas. Cagucuaä rediidxre lojtu, rebi'n sa'csi dirutu jiu xtidz beṅdxab.

Cagucuaä rediidxre lojtu rexi'nä, sa'csi rumbeetu Dios. <sup>14</sup> Abacuaä rediidxre lo guejbtu, redad beṅgool, sa'csi numbeetu Jesucrist nani nabajṅ galooli näjza par tejpas. Abacuaä rediidxre lojtu rebi'n, sa'csi sudzu'tztu, sa'csi yuchee xtidz Dios neṅ lastootu, dirutu jiu xtidz beṅdxab.

<sup>15</sup> Na'c guichagljaztu guntu renani rujn rebejṅ nani di chalilajz xtidz Jesucrist; na'cza chanälaztejtu xhixtentu ni rajptu lo guedxliuj. Palga rinälaztejnu rexhixtenni ni ra'pnu lo guedxliuj, dxejc dinu chanälajz Dios. <sup>16</sup> Rebeṅ guedxliuj ni di chalilajz xtidz Dios rchagljazreni rujnreni redzunguijdxre: rujnreni dzunguijdx nani rchagljaz tiejxhreni; rujnreni dzunguijdx nani rchagljaz balojreni, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac.

17 Luxh rnitlojpac guedxliuj. Sinitlojza guiraa reni rchaglajz rujn reben guedxliuj ni di chalilajz xtidx Dios. Niluxh palga gusoobtisnu xtidx Xtadnu Dios, sibannäjnnuni par tejpas.

*Didx guli näjza didx-xhii*

18 Guejbtu resa'ä ni rililajz xtidx Dios, asiäddzungajxh dxej che guluiloj niguii nani rdxe'ch loj Jesucrist. Abiejn diajgtu siäd niguiiga. Naj yu' xhidajl reniguii nani rdxechlajz lo Crist. Ni'c alaracbeenu asiäddzungajxh dxejga che guluiloj niguiiga. 19 Yu' xhidajl rebejn ni rdxechlajz lo Jesucrist. Biriireni lo resa'nu. Direni nililajz xtidx Jesucrist. Palga nililajzreni xtidx Jesucrist si'c huililaaznu nuure xtidx Jesucrist, direni nirii lo resa'nu. Biriireni lo resa'nu, ni'c racbeenu direni gac xpejn Jesucrist.

20 Gule Dios Jesucrist. Jesucristre baniidx Sprit Dxaan xten Dios loonu te gacheenu xhini'c najc redidxliipac. 21 Et sa'csi ditu gan xhi diidx najc didx guli bacuaä rediidxga lojtu. Sa'csi najntu xhi diidx najc didx guliipac, ni'c bacuaäni, te gutijp lajztu. Palga rucuaä rediidx ni najc guli, anajntu dina gusgueä la'tu.

22 Chutis ni naa di Jesús gac Crist Xi'n Dios, xhet guliidi rextiidxni. Renani rnii di Jesucrist gac Xi'n Dios rdxechlajzni lo Jesucrist. Di reni'c nililajz xtidx Dios. 23 Chutis reni rnii di Jesucrist gac Xi'n Dios, di reni'c gumbee xtadnu Dios. Niluxh renani rnii Jesucrist najc Xi'n Dios, huililajzreni xtidx Dios, numbeezareni Dios.

24 Colgusoob rediidx ni biejn diajgtu galooli che huililajztu rextidx Dios. Palga rusooobtu rediidxga,

nabannäjtu Dios näj xi'nni Jesucrist. <sup>25</sup> Abia'n Jesucrist diidx guniidxni yäl̄nabaṅcoob loonu. Naj ara'pnu yäl̄nabajnre, ra'pnuni par tejpas.

<sup>26</sup> Abacuaä rediidxre lojtu xcuent rebejn ni rlaiz chalilajztu rediidx ni xhet guliidi. <sup>27</sup> Baxhal̄ Jesucrist Sprit Dxaṅ xten Dios loonu. Rbäjzni neṅ lastoonu. Dinu guiquiin chu stee bejn guluii loonu xhi diidx najc gulii, sa'csi lagajc Sprit Dxaṅ xten Dios ruluii xtiidxni loonu. Naj ruluiini la'tu guiraa ni najc gulii, dini gusguee la'tu. Colguibannäj Jesucrist; colgusoob xtid̄x Jesucrist si'cni ruluii Sprit Dxaṅ xten Dios lojtu.

<sup>28</sup> Naj guejbtu resa'ä, colguibannäj Jesucrist, te che jïädsacni lo guedxliuj sisiutzu'tznu nejz lojni, dinu guitujy nejz lojni. <sup>29</sup> Anajntu laaca najc Dios. Anajntu renani rusoob xtid̄x Dios sasanäjreni Dios, ni'c najcreni xi'n Dios.

### 3

#### *Rexi'n Dios*

<sup>1</sup> Bahuii xho huiñälazduxh Dios nuure, ni'c anaj Dios nuure najcnu rexi'nni. Luxh gulii najcnu rexi'n Dios. Rebeṅ guedxliuj ni di chalilajz xtid̄x Dios, direni gumbee nuure, rexi'n Dios, sa'csi dizareni gumbee Dios ni najc xtadnu. <sup>2</sup> Resa'ä ni rinälazä, nuunu riolilaaznu rextid̄x Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani. <sup>3</sup> Che rnaj laaznu sidzujṅ dxej gac tejganu si'c ni najc Jesucrist, dxejc rbaṅsa'cnu si'c ni gubajṅ Jesucrist lo guedxliuj.

<sup>4</sup> Di rebejn ni rujn dojl gusoob leii xten Dios. Che riennu dojl, runijtnu lo leii xten Dios. <sup>5</sup> Racbeenu Jesucrist biääd lo guedxliuj, gujcnı niguii te gujc badzucajni rextojlnu. Laani dini niujn dojl. <sup>6</sup> Che sasanäjnu Jesucrist, dinu gac benguijdx. Di bejn nani rujn dojl chalilajz xtidx Jesucrist, dizani gumbeeni. <sup>7</sup> Resa'ä, na'c chalilajztu didx-xhii ni rniı bejn lojtu, che rniireni cayujntu dojl. Rebejn ni rujn laaca, najczareni si'c najc Jesucrist. <sup>8</sup> Rebejn nani rujn dojl najc xi'n bendxab. Galodooli rujn bendxab dojl. Ni'cni biääd Jesucrist Xi'n Dios lo guedxliuj te gudzucajni redojl nani rujn bejn xcuent bendxab.

<sup>9</sup> Rebejn nani najc xi'n Dios direni guichaglajz gunreni dojl, sa'csi abachaa Dios xcäriejnreni, sa'csi rbäjz Dios nen lastooreni. Direni gun dojl, sa'csi najcreni xi'n Dios. <sup>10</sup> Si'c riembeenu rebejn ni najc xi'n Dios, näjza rebejn ni najc rexi'n bendxab. Chutis tejni di gun dzunsa'c, ni dini chanälajz resa'reni, dini gac xi'n Dios.

### *Nungäjł chanälajznu resa'nu*

<sup>11</sup> Lagajc rediidxre biejn diajgtu galooli che huililajztu rextidx Dios: colchanälajz resa'tu. <sup>12</sup> Xhet si'cdi toCain nani gujc xi'n bendxab. Bejni dojl, bagu'tni bejtzni. ¿Xhicuent bagu'tnini? Bagu'tnini sa'csi bejn bejtzni ganax dzunsa'c, luxh toCain bejn dzunguijdx. <sup>13</sup> Na'c guidxelojtu che guidxechlajz rebejn lojtu. <sup>14</sup> Racbeenu dirunu sa lo xnezyuj yälgujt, sa'csi dinu guidxechlajz loj resa'nu. Rajpnu yälınabajn par tejpas sa'csi rionälaaznu resa'nu. Chutis tej ni di chanälajz resa'reni canzaj lo xnezyuj yälgujt, sa'csi

rdxechlajzreni lo sa'reni. <sup>15</sup> Chutis ni rdxechlajz lo resa'ni, najcni nejz lo Dios si'c ni abagu'tni te bejn. Najnnu che rugu't te niguii te bejn dini ga'p yalnabajn par tejpas. <sup>16</sup> Racheenu rinälajz Jesucrist nuunu, sa'csi gujtni lacuaa nuunu lo cruzj. Sigajcza nungäjł gacnäjnü resa'nu, mase guetnu lacuaa guetreni. <sup>17</sup> Chutis tejnu ni rajp xhidajł xhixtenni, luxh dini gacnäj nicla tejnu ni xhet rajpdi, di bejnğa chanälajz Dios. <sup>18</sup> Guejbtu resa'ä, na'c chanälaaznu resa'nu con rextiidxtisnu, na'c guiniitisnu rionälaaznu resa'nu. Palga rionälaazpacnu resa'nu, sacnäjnü resa'nu.

### *Sisiutzu'tznu nez loj Dios*

<sup>19-20</sup> Palga rionälaaznu resa'nu, nancheenu najcnu rexi'n Dios. Palga jiajbnu xhigab dinu gac beñsa'c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najn rexhigabga. Niluxh Dios anaj: renani rinälaaz resa'reni, reni'c najc rexi'nni. <sup>21</sup> Rniä lo guejbtu nani rinälazä, palga lagajc lastoonu rnii loonu, “cagusooblu xtidx Dios”, sisiutijp lastoonu che rbedx-rniabnu lo Dios. <sup>22</sup> Xhitis ni rniabnu lo Dios, runiidxni loonu sa'csi rusoobnu xtiidxni, riennu redzuun ni ruspaa lajz Dios. <sup>23</sup> Dee najc redidix ni gunibee Dios gusoobnu: chalilaaznu xtidx Dios, diidix ni rnii xho gujt Jesucrist lacuaa nuunu, chonälaazzanu resa'nu si'cni gunibee Dios. <sup>24</sup> Palga rusoobnu guiraa nani gunibeeni, nabañnäjnuni, si'cza nabañnäjni nuunu. Nancheenu nabañnäj Dios nuunu, sa'csi baniidxni Sprit Dxan xtenni te cuääz neñ lastoonu.

## 4

### *Scree gacheenu xhi didx najc guliipac*

<sup>1</sup> Guejbtu renani rinälazä, na'c chalilajztu rextidx chutis bejn nani naa, “rniä rextidx Dios lojtu”. Ganiddoo colgula'tz rextiidxni te gacheetu don chu xtidx caniiini, sa'csi xhidajl bejn sinii lojtu, “nuunu rniinu rextidx Dios”, niluxh canisireni si'c.

<sup>2</sup> Scree gacheenu xhi diidx najc guliipac. Guiraa rebejn nani guinii “Jesucrist, Xi'n Dios, ni biääd lo guedxliuj si'c niguii”, reni'c cayacnäjä Sprit Dxan xten Dios, reni'c canii xtidx Dios. <sup>3</sup> Guiraa rebejn nani di guinii biääd Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejn diajgtu siääd te niguii ni rdxechduxh loj Jesucrist, luxh naj abidzujn rextzuun niguiiga lo guedxliuj.

<sup>4</sup> Guejbtu resa'ä, najcnu rexi'n Dios. Naj abienu gaan lo rebejn ni rdxe'ch lo Jesucrist sa'csi Dios ni rbäjäz neñ lastoonu abejnni gaan lo beñdxab ni nabajn lo guedxliuj. <sup>5</sup> Rebejn ni rnii xhet guliidi xtidx Dios, rililajztisreni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi. <sup>6</sup> Nuunu najcnu xi'n Dios. Rebejn nani riembee Dios riu xtiidxnu. Rebejn nani di gac xi'n Dios direni jiu xtiidxnu. Scree gacheenu chu rebejn rnii didxliipac. Scree gacheezanu chu rebejn rnii diidx ni xhet guliidi.

### *Rinälajz Dios rebejn*

<sup>7</sup> Rniä lo guejbtu nani rinälazä, nanab chanälaaznu resa'nu, renani huililajz xtidx Dios, sa'csi Dios racnäjä nuunu te chanälaaznu resa'nu. Palga rinälaaznu resa'nu, dxejc najcnu rexi'n Dios,



luxh gulii riembeenu Dios. <sup>8</sup> Palga chutis tejnu di chanälajz resa'ni, dizani gumbee Dios, sa'csi lagajc Dios racnäjä chanälaaznu Dios, racnäjäzani chanälaaznu resa'nu. <sup>9</sup> Abasule' Dios loonu lacti rinälajzni nuunu. Yu' tejtis Xi'n Dios. Abaxhalni Xi'nni lo guedxliuj te gudijxni rextojlnu lo cruzj te si'c guibanäjnuni par tejpas. <sup>10</sup> Si'c racbeenu rinälajzpac Dios nuunu. Galoo dinu ninälajz Dios. Niluxh Dios huinälajz nuunu, ni'c baxhalni Xi'nni lo guedxliuj te gudijxni xtojl̄nu lo cruzj.

<sup>11</sup> Rniä lo guejbtu nani rinälazä, si'cni rinälajz Dios nuunu, sigajcza rlajzni chanälaaznu resa'nu. <sup>12</sup> Nicla tej bejn̄ gajd fii lo Dios. Niluxh palga chanälaaznu resa'nu, Dios nabajn̄ nen̄ lastoonu, dxejc gulii rinälaazpacnu Dios. <sup>13</sup> Nancheenu nabanäjnu Dios, sigajcza nabanäjpac Dios nuunu, sa'csi abaxhalni Sprit Dxan xtenni cuääz nen̄ lastoonu. <sup>14</sup> Narä näjza reapost abahuiinu loj Jesucrist. Caniä lojtu abaxhal̄ Xtadnu Dios Xi'nni lo guedxliuj te guslaani rebejn̄ lo xtoj̄lreni. <sup>15</sup> Chutis tejnu ni rnii “Jesucrist najc Xi'n Dios”, nabanäjni Dios, nabanäjza Dios bejn̄ga.

<sup>16</sup> Racbeenu, rililaazzanu rinälajz Dios nuure. Guliduxh rinälajz Dios nuunu. Palga rinälaaznu Dios, nabanäjnu Dios, nabanäjza Dios nuunu. <sup>17</sup> Naj sanälaaznu Dios si'cni rlajzni luxh palga chanälaaznuni guidebtis ni guibajn̄nu, dinu guidxejb che guidzuj̄n̄ dxej ni gun Jesucrist yälguxhtis lo guedxliuj. Dinu guidxejb sa'csi guideb nabajn̄nu lo guedxliuj, nabanäjnu Dios si'c nabanäj Jesucrist Dios. <sup>18</sup> Palga rinälazsa'cnu Dios, dinu guidxejb, palga rinälajzpacnu di gacdi guidxeebnu. Palga guliipacnu rinälaaznu Dios, xhetliidi rdxejb-

dinu. Nani rdxejb, rdejdnı trabajw, gajd bejn̄ga chanälazsa'c Dios.

<sup>19</sup> Rinälaaznu Dios sa'csi ganiddoo Dios huinälajz nuunu. <sup>20</sup> Palga chutis tejnu naa “rinälazä Dios” niluxh rdxechlajzni lo resa'nu, xhet guliidi xtiidxni. Palga dinu chanälajz sa'nu nani cahuiinu, xhixh sajc chanälaazzanu Dios nani gajdnu fii. <sup>21</sup> Agunibee Dios, nani rinälajz Dios chanälajzni resa'ni sigajc rinälajzni Dios.

## 5

### *Riennu gaan lo guiraa redoꞓguijdx lo guedxliuj*

<sup>1</sup> Chutis ni rililajz Jesús najc Crist nani baxhal Dios, ni'c najc Xi'n Dios. Palga rinälaaznu Xtadnu Dios, sigajcza sinälaaznu renani najc Xi'n Dios. <sup>2</sup> Palga rinälaaznu Dios, palga rusoobzanu xtiidxni, dxejc najnnu rinälaaznu resa'nu nani najc Xi'n Dios. <sup>3</sup> Ni'cni, palga rinälaaznu Dios, susoobnu xtiidxni. Luxh dinu guichalo nagajn gusoobnu xtiidxni. <sup>4</sup> Chutis tejnu ni najc xi'n Dios, riennu gaan lo redoꞓl ni re' lo guedxliuj. Riennu gaan lo redoꞓl lo guedxliujre sa'csi huililaaznu xtidx Jesucrist. <sup>5</sup> ¿Chuni'c cayujn gaan lo redoꞓl lo guedxliuj, ä? Renani rililajz najc Jesucrist, Xi'n Dios, reni'c rujn gaan lo redoꞓl lo guedxliujre.

### *Rediidx ni baluii Dios loonu xcuent Jesucrist*

<sup>6</sup> Biääd Jesucrist lo guedxliujre. Birobnis Jesucrist, baxhe'zani xtiejnı lo cruzj. Xhet ganaxdi te guirobnisni biäädni, näjza te guxhe'ni xtiejnı lo cruzj che biäädni. Sprit Dxan xten Dios canii rediidxre. Guliipac rextiidxni. <sup>7</sup> Yu' choꞓ ni baluiloj xhaguibaa. Rniireni xcuent Jesucrist tejsi

diidx. Tejni najc Dios, steeni najc nani laa Diidx, steeni najc Sprit Dxi xten Dios. <sup>8</sup> Sigajcza yu' choṅ ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxi xten Dios. Steeni najc che birobnis Jesucrist, steeni najc che baxhe' Jesucrist xtiejnni lo cruz che gujtni. <sup>9</sup> Palga rililaaznu xtidx rebejṅ ni rbäjz lo guedxliuj, nungäjḷ chalilaazrunu xtidx Dios. Rediidx nani rnii jioṅ reni baluiloj tejsi diidx najcreni con nani rnii Dios xcuent Jesucrist Xi'n Dios. <sup>10</sup> Palga rililaaznu xtidx Jesucrist Xi'n Dios, rnii Dios xcuent Jesucrist neṅ lastoonu. Chutis tejnu ni di chalilajz xtidx Dios, rujnni najc Dios si'c tej ni rusguee sa'csi dini chalilajz xtidx Dios ni rniini xcuent Jesucrist. <sup>11</sup> Scree najc rediidx ni rnii Dios. Abaniidx Dios loonu yälṅabajṅ par tejpas. Yälṅabajṅga biädṅä Xi'nni, Jesucrist. <sup>12</sup> Palga nabannäjnu Xi'nni, rajpnu yälṅabajṅ par tejpas. Palga dinu guibanäj Xi'nni, dinu ga'p yälṅabajṅ par tejpas.

### *Xtixtios con diidx ni rulijdx*

<sup>13</sup> Abacuaä rediidxre lojtu ni rililajz rextidx Jesucrist te gacbeepactu rajptu yälṅabajṅ par tejpas.

<sup>14</sup> Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni. <sup>15</sup> Luxh palga najjnu riu Dios nuunu che rniinu lojni, sigajcza najjnu suniidxni nani rniabnu lojni.

<sup>16</sup> Palga tejnu fii tej resa'nu cayujṅ dojḷ, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yälṅabajṅ lojni. Niluxh yu' te doḷroduxh. Chutis te bejṅ ni

gun dojlga, di Dios gudeed lo bejn̄ga yäl̄nabaj̄n par tejpas. Dizana guiniä guiniabtu lo Dios xcuent bejn̄ ni rujn dolroga. <sup>17</sup> Guiraa redzunguijdx nani rujn rebejn̄ najc dojl̄. Niluxh yu' redojl̄ nani di gun gunijt bejn̄ lo Dios par tejpas palga jiu bejn̄ xtidx Dios.

<sup>18</sup> Racbeenu guiraanu nani najc xi'n Dios di rlaaznu jiennu dojl̄. Racnäj Jesucrist nuunu te di beñdxab gun gaan nuunu, te dizanu gusoob xtidx beñdxab.

<sup>19</sup> Nancheenu nuure najcnu xi'n Dios, niluxh guiraa rebejn̄ nani riutis rextzun guedxliuj cagusoobreni xtidx beñdxab.

<sup>20</sup> Najnnu biääd Jesucrist Xi'n Dios lo guedxliuj. Baluiini nuunu rextidx Dios te jiembeenu Dios, nani najcpac Dios gului. Nabaññäjnu Dios ni najc gului, sa'csi nabaññäjnu Jesucrist. Laani najc Dios ni najc gului. Caguniidxni loonu yäl̄nabaj̄n par tejpas. <sup>21</sup> Resa'ä, na'c guzuxhijbtu lo rebanäjb ni xhet guliidi. Sugacni si'c.

**Xtidxcoob Dios ni biädinä dad Jesucrist**  
**New Testament in Zapotec, Mitla (MX:zaw:Zapotec,**  
**Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

**Copyright Information**

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

5cff1274-8dc3-5398-a94d-f6033bb363c9